



Broj: 01,02,03,03/11-05-1-386/19

Sarajevo, 7. 10. 2019.

IZVJEŠTAJ S 21. CETINJSKOG PARLAMENTARNOG FORUMA

Cetinje, 30. septembar 2019. godine

Na Cetinju je 30. septembra 2019. godine na poziv predsjednika Skupštine Crne Gore Ivana Brajovića održan 21. cetinjski parlamentarni forum, a na kojem je iz Parlamentarne skupštine BiH učestvovao dr. Nikola Špirić, zamjenik predsjedavajućeg Doma naroda Parlamentarne skupštine Bosne i Hercegovine.

Na parlamentarnom forumu, čija je ovogodišnja glavna tema „Parlament i mediji – realnost uzajamnih očekivanja“ bila posvećena odnosu parlamenata i medija i ulozi i odgovornosti koju mediji imaju u promociji kulture političkog dijaloga, učestvovali su zvaničnici i predstavnici parlamenata iz regiona, predstavnici javnih medijskih servisa, te međunarodnih i nevladinih organizacija koje se bave radom medija.

Predsjednik Skupštine Ivan Brajović u svom obraćanju naglasio je da izgradnja demokratskog društva zahtijeva slobodu govora i poštivanje različitosti. Uloga parlamenata je da osiguraju zakonske okvire po evropskim standardima koji će poštivati slobodu medija, a uloga medija je da izvještavaju profesionalno, ne zloupotrebjavajući moć javnog prostora. Zaključio je da su profesionalni mediji temelj slobodnog društva, simbol demokratije i zajednički interes društva u cjelini.

Radni dio 21. cetinjskog parlamentarnog foruma počeo je sesijom o temi: „Odgovornost parlamenata i javnih servisa u promociji kulture političkog dijaloga“. U okviru sesije, koja je praćena dinamičnom raspravom, govorili su potpredsjednica PSOSCE-a Margareta Sederfelt, zamjenik predsjedavajućeg Doma naroda Parlamentarne skupštine Bosne i Hercegovine dr. Nikola Špirić, predsjednica Odbora za informiranje, informatizaciju i medije Hrvatskog sabora Sunčana Glavak, poslanik u Narodnoj skupštini Republike Srbije Mirko Krlić, poslanica iz Državnog zbora Republike Slovenije Violeta Tomić, poslanik u Parlamentu Republike Sjeverne Makedonije Redžail Ismaili, poslanik u Parlamentu Republike Albanije Florenc Spaho i šef Odjeljenja Vijeća Evrope za informaciono društvo Patrik Penink.

Obraćajući se učesnicima Foruma, dr. Nikola Špirić, zamjenik predsjedavajućeg Doma naroda PSBiH, istakao je da je BiH svjesna preporuka Evropske komisije u kojima se zahtijeva poštivanje i osiguravanje uslova za slobodan rad medija i javnih medijskih servisa. U vezi s tim, g. Špirić naglasio je da je uloga parlamenata da tragaju za najboljim zakonskim rješenjima koja će omogućiti slobodan, nepristrasan i profesionalan rad javnih medijskih servisa, što, kako je rekao, jeste odlika svakog demokratski uređenog društva.

Ocjenjujući da svijet ulazi u eru u kojoj ima sve više lažnih vijesti i u kojoj građani gube povjerenje u medije, g. Špirić je naglasio da bi parlamenti trebali biti ključno mjesto za

dijalog o ovim pitanjima. U vezi s tim, osvrnuo se i na političku situaciju u BiH, podvlačeći potrebu uspostavljanja dijaloga i postizanja konsenzusa o svim ključnim pitanjima s ciljem napretka i vraćanja povjerenja građana i u institucije i u medije.

U drugoj sesiji o temi: „Uloga zakonskih rješenja u jačanju slobode i profesionalnosti rada medija“ uvodna izlaganja imali su direktor za pravna pitanja i politiku Evropske radiodifuzne unije Ričard Bernli, predsjednica Odbora za informiranje, informatizaciju i medije Hrvatskog sabora Sunčana Glavak, generalni direktor Radio-televizije Ljubljana Igor Kadunc, generalni direktor TVCG Božidar Šundić, direktor poslovne jedinice Program iz Zagreba Renato Kunić, rukovoditeljica Odjela za međunarodne poslove iz Sarajeva Lejla Babović, generalni direktor Radio-televizije Priština Ngadnjim Kastrati, poslanica u Parlamentu Republike Sjeverne Makedonije Jagoda Šahpaska i poslanica u Skupštini Crne Gore Marta Šćepanović.

U otvorenoj raspravi učesnici su razgovarali o unapređenju zakonodavnih i institucionalnih okvira s ciljem jačanja nezavisnosti, profesionalnosti i veće odgovornosti u radu medija. Istakli su da je za svako demokratsko društvo važno da javni servisi služe interesima i potrebama javnosti, odražavajući politički pluralizam.

Rad 21. cetinjskog parlamentarnog foruma završen je usvajanjem Zajedničke izjave. U njoj je, između ostalog, istaknut značaj medijskog pluralizma, ali i odgovornost za javno izgovorenu riječ. Naglašen je značaj transparentnosti vlasništva nad medijima za zaštitu javne debate u demokratskim društvima. Ukazano je na potrebu daljnjeg razvoja profesionalnog pristupa, odgovornosti i poštivanja etičkih pravila od strane novinara, čemu poslanici mogu pružiti podršku u okviru svojih nadležnosti.

Učesnici su napomenuli da će svojom javnom ulogom i primjerom biti promotori kulture političkog dijaloga i time dodatno raditi na stvaranju ambijenta za sučeljavanje mišljenja i predstavljanje različitih argumentacija, međusobnog razumijevanja i poštivanja drugačijeg mišljenja, s ciljem sveukupnog društvenog napretka.

Učesnici su, također, zahvalili Skupštini Crne Gore na organizaciji Cetinjskog parlamentarnog foruma, koji smatraju značajnim za jačanje kontakata i saradnje na parlamentarnom nivou.

Na marginama 21. cetinjskog parlamentarnog foruma zamjenik predsjedavajućeg Doma naroda Parlamentarne skupštine Bosne i Hercegovine dr. Nikola Špirić sastao se s predsjednikom Skupštine Crne Gore Ivanom Brajovićem.

Tokom susreta zajednički je konstatirano da između dvije susjedne zemlje nema otvorenih pitanja, posebno nakon potpisivanja sporazuma o granici između Bosne i Hercegovine i Crne Gore.

Zamjenik predsjedavajućeg Nikola Špirić istakao je značaj redovnog održavanja Cetinjskog parlamentarnog foruma kao jedne od izuzetno važnih platformi za razgovor o najaktuelnijim temama za cijeli region.

Predsjednik Brajović, napominjući sve veći značaj parlamentarne diplomatije u jačanju bilateralnih odnosa, izrazio je zadovoljstvo prisustvom delegacije Parlamentarne skupštine Bosne i Hercegovine i na ovom Cetinjskom parlamentarnom forumu.

Također, u razgovoru je naglašeno da dobri susjedski odnosi predstavljaju priliku za značajno unapređenje ekonomske saradnje, posebno u oblasti turizma i izgradnje kvalitetnije putne infrastrukture koja bi povezivala dvije zemlje, te osigurala bolju prohodnost granice, posebno u ljetnoj i zimskoj turističkoj sezoni.

Razmijenjene su i informacije o političkim prilikama u Bosni i Hercegovini i Crnoj Gori. U vezi s tim, g. Brajović informirao je g. Špirića o napretku Crne Gore na putu ka Evropskoj uniji.

Istovremeno, zajednički je konstatirano da je u Bosni i Hercegovini nužno što skorije formiranje Vijeća ministara BiH, s ciljem provođenja potrebnih reformi i ubrzanja evropskog puta Bosne i Hercegovine.

Izvještaj pripremila:

Tea Mandilović

Sektor za međunarodne odnose i protokol

Izvještaj odobrio:

Dr. Nikola Špirić

Zamjenik predsjedavajućeg Doma naroda PSBiH

Dostaviti:

- kolegijima oba doma PSBiH
- Komisiji za vanjske poslove Predstavičkog doma PSBiH
- Komisiji za vanjsku i trgovinsku politiku, carine, saobraćaj i komunikacije Doma naroda PSBiH
- Kolegiju Sekretarijata
- Sektoru za međunarodne odnose i protokol
- Sektoru za odnose s javnošću
- a/a